

1

حَيَاتِن مَعْنَى كُلِّ جَانٍ  
حَيَاتِنَ أَوْرَانِ مُنْتَرِي  
كَانِلْ بَرُونِي دَارِ السَّلَامِ

Taklimat

# Muzakarah Pengkursus Ibadat Haji 2019

25 Jamadilakhir 1440H | 2 Mac 2019M

Hj Hairul Azmi bin Hj Abdullah

Pegawai Istinbat

Jabatan Mufti Kerajaan

Jabatan Perdana Menteri

Negara Brunei Darussalam

# **Sujud Tilawah**

# Pengertian Sujud *Tilawah*

Sujud *tilawah* ialah sujud kerana membaca atau mendengar ayat al-Qur'an yang disunatkan padanya sujud. Ayat-ayat al-Quran yang disunatkan sujud *tilawah* itu dinamakan ayat-ayat *sajdah*. Ini bermakna sujud *tilawah* itu merupakan di antara adab-adab ketika membaca al-Qur'an.

# Hukum Sujud *Tilawah*

Sujud *tilawah* adalah *sunat* menurut pendapat jumbuhur ulama. Manakala Imam Abu Hanifah (Imam mazhab Hanafi) berkata bahawa sujud *tilawah* itu wajib sama ada ke atas pendengar atau pembaca.

Hukum sunat ini bersandarkan hadits yang diriwayatkan oleh *Al-Syaikhain* (Al-Bukhari dan Muslim) daripada Ibnu Umar *radhiallahu 'anhuma* katanya:

أَنَّهُ صَلَّى اللَّهُ عَلَيْهِ وَسَلَّمَ كَانَ يَقْرَأُ الْقُرْآنَ فَيَقْرَأُ سُورَةً فِيهَا  
سَجْدَةٌ فَيَسْجُدُ وَنَسْجُدُ مَعَهُ حَتَّىٰ مَا يَجِدُ بَعْضُنَا مَوْضِعًا لِمَكَانِ  
جَبْهَتِهِ.

**Maksudnya:** *Bahawasanya Nabi shallallahu ‘alaihi wasallam telah membaca al-Qur’an, lalu Baginda membaca satu surah yang di dalamnya ada ayat ‘sajdah’, maka Baginda pun bersujud lalu kami pun sujud bersama-sama Baginda sehingga sesetengah daripada kami tidak mendapati tempat untuk meletakkan dahinya.*

# Fadhilat Sujud Tilawah

Menurut hadits yang diriwayatkan oleh Abu Hurairah *radhiallahu 'anhu* tentang *fadhilat* melakukan sujud *tilawah*, Baginda bersabda:

إِذَا قَرَأَ ابْنُ آدَمَ السَّجْدَةَ فَسَجَدَ اعْتَزَلَ الشَّيْطَانُ يَبْكِي. يَقُولُ: يَا وَيْلَهُ! أَمَرَ ابْنُ آدَمَ بِالسُّجُودِ فَسَجَدَ فَلَهُ الْجَنَّةُ, وَأَمَرْتُ بِالسُّجُودِ فَأَبَيْتُ فَلِيَ النَّارُ.

(رواه ابن ماجه)

**Maksudnya:** *Apabila anak Adam itu membaca ayat al-Quran yang menuntut untuk sujud, syaitan akan mengasingkan dirinya lalu menangis dan berkata:” “Celakalah! Anak Adam telah diperintahkan untuk sujud ia pun sujud, maka baginya balasan syurga, dan aku diperintahkan untuk sujud maka aku enggan, maka balasan bagiku adalah neraka.*

(Hadits riwayat Ibnu Majah)

# Mengenali Ayat-Ayat Sajdah

Untuk mengenali ayat-ayat *sajdah* itu pada kebiasaannya, di dalam *mushhaf* ditanda dengan garis dan di penghujung ayat itu ditanda dengan tanda yang berbentuk seakan-akan dom masjid sementara itu di bidainya tertulis perkataan (سجدة).





Antara contoh ayat yang disunatkan sujud setelah membacanya, adalah:

- Ayat ke 77 dari surah Al- Haj:

يَا أَيُّهَا الَّذِينَ ءَامَنُوا ارْكَعُوا وَاسْجُدُوا وَعِبُدُوا رَبَّكُمْ  
وَأَفْعَلُوا الْخَيْرَ لَعَلَّكُمْ تُفْلِحُونَ ﴿٧٧﴾

- Ayat ke 18 dari surah Al- Haj:

أَلَمْ تَرَ أَنَّ اللَّهَ يَسْجُدُ لَهُ مَن فِي السَّمَوَاتِ وَمَن فِي الْأَرْضِ وَالشَّمْسُ  
وَالْقَمَرُ وَالنُّجُومُ وَالْجِبَالُ وَالشَّجَرُ وَالدَّوَابُّ وَكَثِيرٌ مِّنَ النَّاسِ  
وَكَثِيرٌ حَقَّ عَلَيْهِ الْعَذَابُ وَمَن يُهِنِ اللَّهُ فَمَا لَهُ مِن مُّكْرِمٍ إِنَّ اللَّهَ  
يَفْعَلُ مَا يَشَاءُ ﴿١٨﴾

Ayat-Ayat *sajdah*, selain ayat yang disebutkan sebelum ini:

1. Ayat ke 206 dari surah Al -A'raf.
2. Ayat ke 15 dari surah Al- Ra'd.
3. Ayat ke 50 dari surah Al- Nahl.
4. Ayat ke 109 dari surah Al- Isra'.
5. Ayat ke 58 dari surah Maryam.
6. Ayat ke 60 dari surah Al -Furqan.
7. Ayat ke 25 hingga 26 dari surah Al- Naml.
8. Ayat ke 15 dari surah Al -Sajdah.
9. Ayat ke 38 dari surah Fusshilat.
10. Ayat ke 62 dari surah Al- Najm.
11. Ayat pertama dari surah Al- Insyiqaq.
12. Ayat ke 21 dari surah Al -Insyiqaq.
13. Ayat ke 19 dari Al- 'Alaq

# Hikmah Sujud Pada *Ayat Sajdah*

Adapun hikmah pengkhususan sujud pada tempat-tempat atau ayat-ayat yang tersebut di atas kerana ayat-ayat tersebut adalah merupakan pujian bagi mereka yang bersujud dan celaan bagi yang tidak bersujud sama ada secara terang-terangan ataupun secara isyarat sebagaimana yang dinaqalkan oleh Imam Al-Qalyubiy *rahimahullah* perkataan Ibnu Hajar *rahimahullah*.

(Jalaluddin Muhammad bin Ahmad al-Mahalli, Hasyiyatan Qalyubi-'Umairah, Dar al-Fikr, Beirut, 1419-1998, Jil. 1, hlm. 235.)

# **Bila Waktu Sunat Sujud *Tilawah* Itu Dilakukan?**

Sujud *tilawah* itu sunat dilakukan apabila ayat *sajdah* itu dibaca di luar sembahyang bukan pada waktu-waktu yang makruh menunaikan sembahyang sama ada ia bertujuan untuk melakukan sujud atau tidak.

Begitu juga sunat melakukan sujud *tilawah* ketika dalam sembahyang jika dibacakan ayat *sajdah* tersebut. Tetapi tidak disunatkan melakukan sujud *tilawah* jika membaca ayat *sajdah* itu semata-mata bertujuan (*qasad*) untuk melakukan sujud, Bahkan jika dibaca dalam sembahyang dengan *qasad* sujud *tilawah* lalu dia bersujud maka batal sembahyangnya itu. Kecuali jika ia membacanya pada sembahyang fardhu Subuh pada hari Jumaat adalah sunat ia melakukan sujud *tilawah* sekalipun ia bertujuan membacanya untuk sujud.

# Syarat-Syarat Sujud *Tilawah*

Hukum sujud *tilawah* itu sama seperti hukum sembahyang sunat dari segi syarat-syarat sahnya sujud itu, syarat-syarat itu adalah seperti berikut:

- I. Suci daripada hadats (kecil atau besar) dan juga bersih daripada najis sama ada pada tubuh badan, pakaian dan juga tempat.
- II. Orang yang hendak melakukan sujud *tilawah* itu juga di kehendaki dalam keadaan menutup aurat.

- III. Untuk melakukannya hendaklah menghadap kiblat.
- IV. Hendaklah masuk waktunya ketika melakukan sujud itu.

Adapun masuknya waktu sujud itu ialah sebaik sahaja selesai membaca atau mendengar keseluruhan ayat *sajdah*. Jika sekiranya ia bersujud sebelum lagi habis ayat itu di bacanya atau didengarnya maka sujud *tilawah* itu tidak sah dan tidak memadai. (Imam Abi Zakaria Muhyiddin bin Syarf an-Nawawi, Kitab al-Majmu', Dar al-Fikr, Beirut, 2000, Jil. 4, hlm. 65-66.)

# **Sujud *Tilawah* Di Dalam Sembahyang**

Cara untuk melaksanakan sujud *tilawah* itu ada dua keadaan iaitu ketika dalam keadaan bersembahyang dan di luar sembahyang.

Sujud *tilawah* boleh dilakukan di dalam sembahyang, bahkan hukumnya adalah sunat, sama ada sembahyang itu dilakukan secara persendirian atau berjemaah. Kedudukan ma'mum pula untuk melakukan sujud *tilawah* itu, bergantung kepada imam. Jika imam bersujud kerana ayat *sajdah* iaitu ayat yang menuntut sujud, maka wajib ke atas ma'mum mengikuti perbuatan imam dengan melakukan sujud itu kerana jika tidak, maka batal sembahyangnya.



# Imam Tidak Melakukan Sujud *Tilawah*

Sebaliknya jika imam tidak melakukannya maka ma'mum adalah tidak dikehendaki untuk melakukan sujud. Jika dilakukannya juga, maka sembahyangnya menjadi batal. Akan tetapi harus dan sunat hukumnya bagi ma'mum melakukan sujud *tilawah* selepas selesai memberi salam dengan syarat jarak di antara sujud dan salam itu tidak lama.

# Ma'mum tidak Mengetahui Imam Melakukan Sujud *Tilawah*

Jika sekiranya ma'mum tidak mengetahui bahawa imam telah melakukan sujud *tilawah* sehinggalah imam mengangkat kepalanya daripada sujud, maka tidaklah batal sembahyang ma'mum itu. Dia dimaafkan kerana tertinggalnya daripada perbuatan imamnya itu dan juga tidak dikehendaki melakukan sujud. (Syamsuddin Muhammad bin abi al-'Abbas Ahmad bin Hamzah ibn Syihabuddin ar-Ramli al-Manufi al-Mashri al-Anshari, Nihayah al-Muhtaj, Dar al-Kutb al-'Ilmiyyah, Beirut, t.th. jil. 2, hlm. 100.)

# Sujud *Tilawah* Di Luar Sembahyang

Sepertimana yang telah dijelaskan bahawa sujud *tilawah* itu sunat juga dilakukan di luar sembahyang iaitu setelah selesai menghabiskan bacaan ayat *sajdah* atau mendengarnya, jika hendak melakukan sujud *tilawah* hendaklah berniat sujud *tilawah* kemudian bertakbir *iftitah* seperti *takbiratul ihram* dalam sembahyang.

Niat sujud *tilawah* ini adalah wajib bersandarkan kepada hadis Baginda *Shallallahu 'alaihi wasallam* :

إِنَّمَا الْأَعْمَالُ بِالنِّيَّاتِ

**Maksudnya:** *Sesungguhnya amal perbuatan itu hanyalah dengan niat*

Begitu juga dengan *takbir iftitah* hukumnya adalah wajib kerana ia adalah merupakan syarat sujud *tilawah* itu menurut pendapat *al-ashah*.

Di samping berniat di dalam hati ia juga disunatkan melafazkan niatnya itu, seperti:

نَوَيْتُ سُجُودَ التَّلَاوَةِ لِلَّهِ تَعَالَى

**Ertinya:** *Sahaja aku melakukan sujud tilawah kerana Allah Ta'ala*

Kemudian bertakbir sekali lagi untuk melakukan sujud tanpa mengangkat tangannya. Apabila hendak bangun dari sujud adalah disunatkan ketika mengangkat kepalanya dengan bertakbir.

Adalah disunatkan menurut pendapat *al-shahih* memanjangkan bacaan takbir yang kedua ketika hendak sujud sehingga ia meletakkan dahinya ke tempat sujud, dan juga bagi takbir yang ke tiga ketika bangkit dari sujud sehingga duduk semula.

Setelah ia bangun dari sujud maka disudahi dengan salam iaitu dalam keadaan dia duduk tanpa bertasyahhud. Salam menurut pendapat *al-azhar* adalah wajib kerana ia merupakan syarat sebagaimana di dalam kitab *Syarah Al-Minhaj*.

Imam Abi Zakaria Muhyiddin bin Syarf an-Nawawi, Kitab al-Majmu', Maktabah al-Irsyad, Jeddah, t.th, Jil. 3, hlm. 561.

Kesimpulannya perkara yang dituntut dan juga merupakan rukun sujud *tilawah* bagi orang yang melakukannya bukan di dalam sembahyang ialah niat sujud, takbir seperti yang dilakukan ketika hendak mengangkat takbir untuk menunaikan sembahyang, sujud dan juga salam.

Perlu diingat bahawa untuk melakukan sujud *tilawah* di luar sembahyang ini tidak disunatkan bangun dari duduk untuk berdiri (*qiam*) kemudian melaksanakan sujud, bahkan memadai hanya dalam keadaan duduk. Sementara itu jika dia dalam keadaan berdiri maka dilakukan *takbiratul ihram* dalam keadaan berdirinya itu kemudian membaca takbir dan sujud. (Imam Abi Zakaria Muhyiddin bin Syarf an-Nawawi, *At-Tibyan Fi Adab Hamlah al-Qur'an*, Dar as-Salam, Mesir, 1429-2008, hlm. 240-241.)

# Bacaan Atau Zikir Ketika Sujud *Tilawah*

Adalah sunat hukumnya membaca zikir ketika di dalam sujud *tilawah*. Di antara zikir yang digalakkan itu ialah:

سَجَدَ وَجْهِي لِلَّذِي خَلَقَهُ وَصَوَّرَهُ وَشَقَّ سَمْعَهُ وَبَصَرَهُ بِحَوْلِهِ  
وَقُوَّتِهِ فَتَبَارَكَ اللَّهُ أَحْسَنُ الْخَالِقِينَ

**Ertinya:** *Telah sujud wajahku kepada (Allah,Zat) yang Menciptakannya, yang Membentuknya dan yang Membuka pendengarannya serta penglihatannya dengan daya dan kekuatanNya maka Maha berkat (serta maha tinggilah kelebihan) Allah sebaik-baik Pencipta.*



Dan zikir yang lain sebagaimana yang di sebut dalam hadits Baginda *shallallahu 'alaihi wasallam*:

اللَّهُمَّ اكْتُبْ لِي بِهَا عِنْدَكَ أَجْرًا واجْعَلْهَا ذَخْرًا وَضَعْ عَنِّي بِهَا  
وِزْرًا وَاقْبَلْهَا مِنِّي كَمَا قَبِلْتَهَا مِنْ عَبْدِكَ دَاوُدَ

(رواه الترمذی)

**Maksudnya:** *Ya Allah tuliskan bagi ku dengan sujud ini pahala dan jadikanlah sujud ini berharga di sisiMu, hindarkanlah daripadaku dosa dengannya dan terimalah ia daripadaku sepertimana Engkau menerima sujud hambaMu Daud.*

(Hadits riwayat al-Tirmidzi)

Sementara itu Al-Ustaz Ismail Al-Dharir di dalam tafsirnya menaqalkan bahawa Imam Asy-Syafi'ie memilih untuk diucapkan di dalam sujud tersebut :

سُبْحَانَ رَبِّنا إِنْ كَان وَعْدُ رَبِّنا لَمَفْعُولاً

**Ertinya:** *Maha suci tuhan kami, sungguh janji Tuhan kami tetap terlaksana.*

Walau bagaimanapun adalah harus dibawakan zikir yang biasa digunakan di dalam sujud sembahyang.

Menurut Imam Al-Qalyubiy bahawa sujud *tilawah* itu boleh diganti dengan zikir berikut bagi orang yang tidak melakukan sujud walaupun ia suci dari hadas (dalam keadaan berwudhu) seperti ucapan:

سُبْحَانَ اللَّهِ وَالْحَمْدُ لِلَّهِ وَلَا إِلَهَ إِلَّا اللَّهُ وَاللَّهُ أَكْبَرُ

**Ertinya:** *Maha suci Allah dan segala puji-pujian bagiNya, tiada tuhan yang berhak disembah melainkan Allah dan Allah itu Maha Besar.*

Dibaca zikir tersebut sebanyak empat kali kerana ia boleh menggantikan tempat *tahiyatul masjid*.

(Al-ustadz ad-Duktur Wahbah az-Zuhaili, Al-Fiqh al-Islamiy wa Adillatuh, Dar al-Fikr, 1418-1997, Jil. 2, hlm. 1136.)

# **Bacaan Doa Qunut**

# Hukum Doa Qunut Dalam Sembahyang

Qunut adalah salah satu daripada sunat-sunat *ab'adh* dalam sembahyang yang tuntutanannya termasuk dalam kategori sunnah *mu'akkadah* (yang sangat dituntut). Jika tertinggal atau senghaja ditinggalkan qunut ini, sungguhpun ia tidak membatalkan sembahyang, akan tetapi ia merupakan suatu kekurangan dan kerugian. Dari itu, bagi menambal kekurangan tersebut, disunatkan bagi orang yang tertinggal atau senghaja meninggalkan qunut untuk mengerjakan sujud sahwi bagi menambal kekurangan tersebut.

Jika dia syak atau ragu-ragu sama ada dia telah mengerjakan qunut atau tidak, maka dalam hal ini dia disunatkan untuk mengerjakan sujud sahwi kerana pada dasarnya dia dikirakan belum mengerjakannya.

Walau bagaimanapun, hanya qunut sembahyang fardhu Subuh serta qunut sembahyang sunat Witr pada separuh kedua bulan Ramadhan sahaja yang jika tertinggal ataupun ditinggalkan maka disyariatkan sujud sahwi. Adapun bagi qunut nazilah pula, jika ia tertinggal atau ditinggalkan, maka tidak disyariatkan sujud sahwi.

Bagi orang yang tidak pandai membaca qunut pula, disunatkan ke atasnya untuk berdiri dalam kadar bacaan qunut. Sekiranya dia meninggalkan pensyariatan berdiri dalam kadar bacaan qunut ini, sama ada kerana tertinggal ataupun disenghajakan, maka disunatkan juga sujud sahwi ke atasnya. (Irsyad Hukum, Jabatan Mufti Kerajaan, 02/2013.)

# Kedudukan Ma'mum Apabila Imam Tertinggal Atau Meninggalkan Qunut

Apabila seorang imam meninggalkan qunut sama ada kerana sengaja ataupun tidak, maka ma'mum hendaklah mengikut imamnya meninggalkan qunut itu. Bagaimanapun, harus bagi ma'mum untuk mengerjakan qunut yang ditinggalkan oleh imamnya itu secara bersendirian dengan syarat dia masih sempat mengerjakan sujud yang pertama bersama-sama imam.

(Al-Imam Syihabuddin Ahmad bin Hajr al-Haitami, Hawasyi asy-Syaikh Abdul Hamid asy-Syarwani wa asy-Syaikh Ahmad bin Qasim al-'Abbadi, Dar al-Fikr, Beirut, 2014, jil. 2, hlm. 186, Syamsuddin Muhammad bin abi al-'Abbas Ahmad bin Hamzah ibn Syihabuddin ar-Ramli al-Manufi al-Mashri al-Anshari, Nihayah al-Muhtaj, Dar al-Kutb al-'Ilmiyyah, Beirut, t.th. jil. 2, hlm. 75-76, Al-'Allamah Abi Bakr 'Utsman bin Muhammad Syaththa ad-Dimyathi al-Bakri, Hasyiyah l'anah ath-Thalibin, Al-Maktabah at-Taufiqiyah, Mesir, t.th., jil. 1, hlm. 435.)



Jika ma'mum tersebut khawatir dia tidak akan sempat mengerjakan sujud yang pertama bersama-sama imam sekiranya dia mengerjakan qunut yang ditinggalkan oleh imamnya itu, maka dalam hal ini ma'mum itu tidak diharuskan untuk mengerjakan qunut tersebut. Jika dikerjakannya juga, maka sembahyang ma'mum itu belum dikira batal kecuali setelah dia ketinggalan dua rukun *fi'li* daripada imam, yaitu dengan turunnya imam untuk mengerjakan sujud yang kedua sedangkan ma'mum masih mengerjakan qunut.

Syamsuddin Muhammad bin abi al-'Abbas Ahmad bin Hamzah ibn Syihabuddin ar-Ramli al-Manufi al-Mashri al-Anshari, Nihayah al-Muhtaj, Dar al-Kutb al-'Ilmiyyah, Beirut, t.th. jil. 2. hlm.75. Asy-Syaikh 'Abd al-Hamid asy-Syarwani, Hawasyi asy-Syaikh Abdul Hamid asy-Syarwani wa asy-Syaikh Ahmad bin Qasim al-'Abbadi, Dar al-Fikr, Beirut, 2014, jil. 2, hlm. 367, Syamsuddin Muhammad bin abi al-'Abbas Ahmad bin Hamzah ibn Syihabuddin ar-Ramli al-Manufi al-Mashri al-Anshari, Nihayah al-Muhtaj, Dar al-Kutb al-'Ilmiyyah, Beirut, t.th. jil. 2, hlm. 75.

# **Ma'mum Bermazhab Syafi'e Mengerjakan Sembahyang Subuh Berimamkan Imam Bermazhab Hanafi Atau Hanbali**

Persoalannya, dalam sembahyang berjemaah jika imam tidak membaca doa qunut sama ada dia terlupa atau sengaja meninggalkannya atau doa qunut sememangnya tidak disyariatkan menurut mazhab tertentu seperti mazhab Hanafi dan Hanbali sebagaimana yang biasa dialami apabila menunaikan sembahyang fardhu Subuh berjemaah di Masjidil Haram, Makkah, maka dalam hal yang sedemikian, apakah yang perlu dilakukan oleh ma'mum yang berimamkan dengan imam tersebut?

Dalam hal ini, Imam Ibn Hajar al-Haitami *rahimahullah* berkata:

وَلَوْ اقْتَدَى شَافِعِيٌّ بِحَنَفِيٍّ فِي الصُّبْحِ وَأَمَكَّنَهُ أَنْ يَأْتِيَ بِهِ وَيَلْحَقَهُ  
فِي السَّجْدَةِ الْأُولَى فَعَلَ وَإِلَّا فَلَا ، وَعَلَى كُلِّ يَسْجُدٍ لِلسَّهْوِ عَلَى  
الْمَنْقُولِ الْمُعْتَمَدِ بَعْدَ سَلَامِ إِمَامِهِ.

**Ertinya:** “Jika seorang yang bermazhab Syafi’i mengikut (berimamkan) seorang yang bermazhab Hanafi di dalam sembahyang Subuh (sedang dia tidak membaca doa qunut kerana di dalam mazhab Hanafi tidak disunatkan membaca doa qunut). (Jika) dia (ma’mum Syafi’i) dapat membaca doa qunut dan sempat mendapati imam pada sujud pertama, (maka sunat) dia melakukan (perkara tersebut). Jika dia tidak dapat melakukannya, maka tidak (disunatkan dia melakukannya dan batal sembahyangnya jika dia tertinggal dua rukun sembahyang yang panjang). (Walaupun bagaimanapun) dalam semua hal (tersebut), dia (disunatkan) bersujud sahwi menurut qaul muktamad selepas salam imamnya.”

Berdasarkan *nash* yang disebutkan di atas, jika imam tidak membaca doa qunut di dalam sembahyang Subuh, ma'mum disunatkan membaca doa qunut jika dia sempat melakukan sujud bersama-sama dengan imam pada sujud yang pertama. Jika dia tidak sempat berbuat demikian (membaca qunut dan sujud bersama-sama imam pada sujud yang pertama), maka hendaklah dia mengikut apa yang dilakukan oleh imam. Kemudian selepas itu, sama ada dia sempat membaca qunut ataupun tidak, disunatkan lagi baginya untuk melakukan sujud sahwi kerana terdapat kekurangan di dalam sembahyang **imamnya**.

(Al-Imam Syihabuddin Ahmad bin Hajr al-Haitami, Hawasyi asy-Syaikh Abdul Hamid asy-Syarwani wa asy-Syaikh Ahmad bin Qasim al-'Abbadi, Dar al-Fikr, Beirut, 2014, jil. 2, hlm. 186-187.)

Sujud sahwi tersebut, dilakukan selepas imam memberi salam, sebelum ma'mum sendiri memberi salam, sebagaimana yang diterangkan oleh Syeikh Abdul Hamid asy-Syarwani *rahimahullah* katanya:

فَيُسَنُّ لِلشَّافِعِيِّ السُّجُودُ قُبَيْلَ سَلَامِهِ وَبَعْدَ سَلَامِ إِمَامِهِ سِوَاءَ أَتَى  
الْمَأْمُومُ بِالْقُنُوتِ أَوْ لَمْ يَأْتِ بِهِ، لِأَنَّ سُجُودَهُ لِتَرْكِ إِمَامِهِ الْقُنُوتَ  
لَا لِتَرْكِ نَفْسِهِ.

**Ertinya:** *“Disunatkan (ketika sembahyang Subuh) bagi ma’mum yang bermazhab Syafi’e melakukan sujud sahwi sebelum dia memberi salam setelah imamnya (yang bermazhab Hanafi atau Hanbali) memberi salam, sama ada ma’mum itu telah membaca qunut ataupun tidak, kerana sujudnya (ma’mum itu) adalah disebabkan imamnya meninggalkan qunut bukannya kerana dia sendiri yang meninggalkannya.”*

Al-Imam Syihabuddin Ahmad bin Hajr al-Haitami, Hawasyi asy-Syaikh Abdul Hamid asy-Syarwani wa asy-Syaikh Ahmad bin Qasim al-‘Abadi, Dar al-Fikr, Beirut, 2014, jil. 2, hlm. 214. Hawasyi AsSYarwani wa Ibn Qasim: 2/197.

Menurut *nash* yang disebutkan di atas, apabila seseorang itu menjadi ma'mum di belakang imam yang bermazhab Hanafi atau Hanbali semasa sembahyang Subuh, maka sunat bagi ma'mum itu melakukan sujud sahwi sebelum dia memberi salam setelah imam itu selesai memberi salam, sama ada ma'mum itu membaca qunut ketika i'tidal ataupun tidak membacanya, kerana sujud sahwi yang dilakukannya itu adalah disebabkan imam tersebut tidak membaca qunut.



Menurut ulama, untuk mendapatkan pahala bacaan doa qunut memadai dengan doa dan pujian, seperti:

اللَّهُمَّ اغْفِرْ لِي يَا غَفُورٌ، وَارْحَمْنِي يَا رَحِيمٌ.

**Ertinya:** *“Ya Allah, ampunkanlah aku, Wahai Tuhan Yang Maha Pengampun, dan rahmatilah aku wahai Tuhan Yang Maha Mengasihani.”*

Jelasnya, mengikut *nash-nash* ulama yang telah disebutkan, jika seseorang yang bermazhab Syafi'i mengikut imam yang bermazhab Hanafi atau Hanbali yang menurut pendapat mereka bahawa bacaan qunut tidak disyariatkan ketika mengerjakan sembahyang Subuh, sebagaimana yang berlaku di Kota Makkah, ma'mum yang bermazhab Syafi'i disunatkan untuk membaca doa qunut jika dia sempat melakukan sujud bersama imam pada sujud yang pertama. Jika dia tidak sempat berbuat demikian (membaca qunut dan sujud bersama-sama dengan imam pada sujud yang pertama), maka hendaklah dia mengikut apa yang dilakukan oleh imam. Kemudian selepas itu, disunatkan lagi baginya untuk melakukan sujud sahwi sebelum dia memberi salam selepas imam tersebut memberi salam, kerana sujud sahwi itu adalah disebabkan imam tersebut tidak membaca qunut.

Apa yang perlu diambil perhatian ialah jika ma'mum itu memilih untuk membaca qunut, maka hendaklah dia memastikan supaya tidak akan tertinggal dua rukun *fi'li* daripada imamnya ketika membaca qunut itu kerana jika tertinggal dua rukun *fi'li* itu tanpa ada keuzuran, maka batallah sembahyang ma'mum tersebut.

والله أعلم بالصواب  
*Terima Kasih*

جِبَاتِن مَفِي كَلِّ جَانِ  
جِبَاتِنِ قُرْآنِ مُنْتَرِي  
كَانِل بَرُونِي دَا لِسْتَا مَرَا

**DARULIFTA BRUNEI DARUSSALAM,**  
SPG.26 JALAN PENGIRAN BABU RAJA, BANDAR  
SERI BEGAWAN BA2112, NEGARA BRUNEI  
DARUSSALAM

TELEFON: 2235121, 2224955/56  
FAX: 2235120

Website: [www.brunet.bn/gov/mufti](http://www.brunet.bn/gov/mufti)  
EMAIL: [mufti@brunet.bn](mailto:mufti@brunet.bn) / [fatwa@brunet.bn](mailto:fatwa@brunet.bn)